

¿Bañan nórk oraiñ die begiratuko?
 Eriotzak du laster bereganduko
 Penaz ama tristea....
 Bañan jez!: eguzkiya baño argiyago,
 Izarrik ederrena baño ederrago,
 Dator Karidadea,
 Zabaltzera eche artan bere mantua,
 Geldi dedin bertatik kanporatua
 Oso beti-betiko doakabea.

KARMELO ECHEGARAY-KOAK.



¡GAISOAK!



Urikalduak, ichas ta legorrean,
 Badiruri obitik gaur datozela
 Esanaz:—¡Begira ¡or! gure echean
 Zuen aurrean agertutzendan gela!
 Emakume bat belauniko lurrean
 Aurrak besoetatik daukazkiela
 —¿Non da aitacho, ama?—galdetutzean
 —¡Ogiya, ama!—eskatzen diotela!—
 ¡O!... ¡Korri! ¡Korri zagun konsolatzerá
 Alargun-umezurtzak! ta esatera
 Emen gatoz gu zuei laguntzera!
 Zerbaitengatik zera ¡bai! Donostia,
 Nere erri kutun ta paregabia,
 Karidadeak duen kabi maitia!

ANTONIO ARZÁC.

